

LISTOVI...

GRAČANIČKI GLASNIK
časopis za kulturnu historiju

Broj 55
Godina XXVIII
Maj, 2023.
[str. 209-220]

© Monos 2023

LISTOVI...

Listovi Gračaničkog kalendara od 18. 11. 2022. do 1. 5. 2023.

Prof. dr. Omer Hamzić

18. 11. 2022.

Nove montažne kuće za četiri socijalno ugrožene porodice

Radi se o završetku projekta stambenog zbrinjavanja najugroženijih porodica koji su krajem marta ove godine započeli Grad Gračanica i Fondacija "Kuća dobrih tonova" i to na četiri lokacije područja Grada Gračanica. Grad je pomogao novčanim sredstvima, ali i obezbjeđenjem projektne dokumentacije, uređenjem infrastrukture i izradom temeljnih ploča za svaki objekat. Fondacija je obezbijedila građevinski materijal, stručnu radnu snagu, a radili su i volonteri okupljeni oko ovakvih projekata. Pomogao je i Centar za socijalni rad i mjesne zajednice u kojima su izgrađeni objekti. U svoj novi dom uselile su porodice Arnaut, Mujkanović, Piskić i Durmić iz Gornje Orahovice, Donje Orahovice, Doborovaca i Javora.

25. 11. – 31. 12. 2022.

Počela "Zima u Gračanici 2022/23"

Radi se o jednomjesečnoj kulturno-zabavnoj manifestaciji koja će biti ispunjena skoro svakodnevnim "događajima", u centru grada, Bosanskom kulturnom centru i na Rukometnom igralištu. Građani će moći uživati u raznim zabavnim programima, muzičkim priredbama, kulturnom događajima poput promocija knjiga, likovnih i drugih izložbi. U programu je, između ostalog, predviđena i promocija najnovijeg broja ovog časopisa. Manifestacija je počela izložbom starih fotografija "Gračanica kroz prošlost" (koju je u povodu 25. novembra – Dana državnosti BiH priredio i postavio Edin Šaković), a završit će se tradicionalnom dočekom Nove godine na otvorenom i muzičkom priredbom u centru grada.

29. 11. 2022.**Održana 22. sjednica Gradskog vijeća Gračanica: budžetski prihodi u porastu, Mirzet Topčagić novi predsjedavajući Vijeća**

Pred vijećnicima se našlo trinaest tačaka dnevnog reda, od kojih je u centru pažnje bio Izvještaj o izvršenju budžeta za period od 1. januara do 30. septembra ove godine. U navedenom periodu ostvaren je Budžet u iznosu od 14.824.440 KM ili 79,68% od plana. Budžetski prihodi ostvareni su u iznosu od 12.317.298 KM ili 91,99%. Veće ostvarenje prihoda po osnovu poreza na dohodak je za 18,85%, a ostvarenje iz indirektnih poreza za 2,59%. Neporezni prihodi su u podbačaju za 20,33% u odnosu na plan zato što nije došlo do realizacije nekih planiranih projekata za ovu godinu. U nastavku sjednice, vijećnici su "primili k znanju" nekoliko informacija o kojima nije bilo nikakve rasprave. Između ostalih: Informaciju o realizaciji projekata koji su finansirani sredstvima viših nivoa vlasti i međunarodnih donatora, Informaciju o realizaciji infrastrukturnih projekata na području grada Gračanica, Informaciju o stanju u kulturi i realizaciji projekata iz kulture na području grada Gračanica, te Informaciju o upravljanju parking prostorom. Vijeće se bavilo i nekim kadrovskim rješenjima unutar svojih stalnih komisija i radnih tijela, te izabralo za svog novog predsjedavajućeg Mirzeta Topčagića (SDP), umjesto Nihada Krajinovića, koji je ne proteklim izborima izabran za poslanika u Parlamentarnu skupštinu Federacije BiH. Na mjesto zamjenika predsjedavajućeg izabrana je vijećnica Dženita Dugić (SDP).

30. 11. 2022.**Otvoren hotel "Etna" u Gračanici**

Hotel se nalazi u kompleksu istoimenog tržnog centra, pored magistralnog puta Doboj – Tuzla, nedaleko od raskrsnice za Sočkovac, raspolaže sa 34 moderno uređene dvokrevetne i trokrevetne sobe, te 5 luksuznih apar-

tmata. Uz privatni i besplatni parking, komforni i autentični restoran, te besplatni WiFi i LAN internet u svim sobama i apartmanima, u sastavu hotela je i konferencijska/svadbena sala, soba za molitvu, banka u neposrednoj blizini, hipermarket, dječija igraonica, električno punjenje auta i td. U svakom slučaju, "Etna" svojim hotelom značajno upotpunjuje turističku ponudu Gračanice.

12. 12. 2022.**Program finansijske konsolidacije i/ili restrukturiranja JZU Opće bolnice "Dr. Mustafa Beganović" Gračanica za period 2022.-2024....**

...usvojila je Vlada Tuzlanskog kantona i donijela odgovarajuću odluku, kojom je usvojila zahtjev za pokretanje postupka finansijske konsolidacije i/ili restrukturiranja te javne zdravstvene ustanove. Zakonom o finansijskog konsolidaciji i restrukturiranju javnih zdravstvenih ustanova, za JZU Opća bolnica Gračanica predviđena su namjenska finansijska sredstva u iznosu od 4 miliona KM. Namjenska sredstva iz Budžeta Federacije BiH planirana su za plaćanje dugovanja prema dobavljačima za isporučenu robu, za nabavku novog sanitetskog vozila sa opremom, za nabavku digitalnog monografskog sistema, nabavku automatskog parnog sterilizatora i druge opreme, te za dogradnju i proširenje dijela objekta bolnice. Navedenim investicijama, kako je službeno saopćeno, stvorit će se znatno bolji uslovi za pružanje zdravstvenih usluga i direktno doprinijeti konsolidaciji stanja u ovoj javnoj zdravstvenoj ustanovi.

14. 12. 2022.**Promocija 54. broja "Gračaničkog glasnika": predstavljeni ratni komandanti 111. gračaničke brigade**

Promocija je održana u Dershani Osman-kapetanove medrese. Gosti promocije bili su komandanti 111. gračaničke brigade: Tarik Nuhanović, Smail Mešić, Džemo Jukan i

Smail Oštraković. Njihova sjećanja objavljena su u tematskom dijelu ovog broja Časopisa, a u povodu trideset godišnjice od početka agresije na BiH 1992. godine. Uz objavljena sjećanja u prethodnom broju najodgovornijih članova vojno-političkog rukovodstva opštine, koje je 1992. godine organizovalo odbranu općine Gračanica (Hazim Vikalo, Osman Puškar, Reuf Sokolović, Faruk Širbegović, Ibro Nurikić i Faruk Huskanović), sa sjećanjima ratnih komandanata 111. brigade i rahm. komandanta 212. oslobodilačke Bahrije Džananovića, koja su objavljena u ovom broju, "Gračanički glasnik" na najbolji način zaokružuje jednu memoarsku mega-priču o herojskoj odbrani Gračanice. To je posebno akcentirao glavni i odgovorni urednik "Gračaničkog glasnika" prof. dr. Omer Hamzić, koji je i bio nosilac ovog projekta, predstavljajući sadržaj ovog broja. Osim ratnih komandanata 111. brigade, skupu su se prigodnim riječima obratili i Osman Puškar, komandant Operativne grupe 2 Gračanica i Faruk Širbegović, ratni potpredsjednik Izvršnog odbora opštine i komandant Civilne zaštite Gračanica, koji je bio jedan od inicijatora da se ova sjećanja napišu i objave.

20. 12. 2022.

Besplatan Wi-Fi u Gračanici

U cilju uvođenja besplatnog Wi-Fi-a za građane i posjetioce u javnim prostorima, Grad Gračanica je instalirao opremu za bežični internet na području grada. Uz zamjenu postojeće mreže novom, bržom i kvalitetnijom mrežom, instalirana je oprema na novim lokacijama, čime je proširena mreža i pokrivenost besplatnog gradskog interneta, saopćeno je iz Gradske uprave. Nove pristupne tačke u Gračanici instalirane su na lokacijama: Privredno-kulturno-sportski centar (PKSC) "Bazen", Centralni gradski park, rukometno igralište, područje oko Bosanskog kulturnog centra (BKC-a) te srednjoškolski park i prostor ispred Gradske uprave Gračanica. Ukoliko se ukaže potreba, postojeća

mreža će se dodatno proširivati novim pristupnim tačkama.

22. 12. 2022.

Javna preduzeća "Komus" i "Vodovod i kanalizacija" Gračanica dobili priznanje (certifikate) za bonitetnu pouzdanost u 2022.

Priznanja su dodijeljena na Konferenciji "Pouzdanost 2022.", održanoj u Sarajevu, koju tradicionalno, krajem godine, organizuju "Poslovne novine" u saradnji sa svojim partnerima, dok su certifikati svečano uručeni na prigodnom skupu u Tuzli. Za razliku od ranijih godina, ove godine u fokusu istraživanja bonitetnosti našla su se mala i mikro preduzeća, koja su ispunjavala zadate kriterije. Na ovom skupu mogli su se čuti i sljedeći podaci: završne račune za prošlu godinu predalo je ukupno 35.726 kompanija, od kojih se samo 5.814 ili 16% moglo svrstati u kategoriju bonitetnih. Te kompanije su u prethodnoj godini ostvarile ukupan prihod u iznosu od 21.7 i izvoz u vrijednosti od 4.2 milijarde maraka.

23. 12. 2022.

Javno preduzeće "Vodovod i kanalizacija" i "Eko toplane" Gračanica dobitnici priznanja "Lider biznisa TK" za 2022. godinu

Priznanja su dodijeljena na manifestaciji koju osmi put po redu organizuju novine "Glas TK" uz podršku Vlade i Turističke zajednice TK. Priznanja su dodijeljena kompanijama iz različitih oblasti: građevinarstva, proizvodnje, energetike i rudarstva, uslužnih i obrtnih djelatnosti. U saradnji sa Turističkom zajednicom TK dodijeljena su i priznanja "Turističke zvijezde TK". JP "Vodovod i kanalizacija" dobitnik je priznanja u kategoriji uslužnih djelatnosti, a "Eko toplane" u kategoriji energetike i rudarstva.

24. 12. 2022.**Četvrta po redu "Četenijada" u Stjepan Polju kod Gračanice**

Organizatori "Četenijade", koja se održava pod nazivom "Mladost i iskustvo" su Omladinski kulturni centar "Bosna Art" i sekcije Udruženja žena Stjepan Polje. Na takmičenju je uzelo učešća čak četrnaest ekipa-udruženja žena. Po uspjehu i ocjeni žirija najbolje su bile ekipe sljedećih udruženja žena (po rang listi): "Gradina" Soko, "Ruža" Donja Lohinja, "Žene za tradiciju" Šerići i Pribava. Nagradu za najveseliju ekipu dobile su članice Udruženja žena "Plodovi zemlje" Lukavica.

29. 12. 2022.**Održana 23. sjednica Gradskog vijeća: usvojen Budžet Grada za 2023.**

Prije prelaska na dnevni red, puno vremena ovoga puta vijećnici su potrošili u raspravi o inicijativi kluba SDA da se uposlenicima Gradske uprave i javnih preduzeća i ustanova, kojima je grad osnivač, isplati jednokratna pomoć. Za inicijativu nije bilo dovoljno podignutih ruku. Većina vijećnika je inicijativu procijenila politikantstvom. U centru pažnje, ipak, bio je Budžet grada za 2023. godinu, koji je jednoglasno usvojen u iznosu od 23.850.062. marke, što je više za 6.496.711 maraka u odnosu na nacrt. Sudeći po ostvarenju za 9 mjeseci 2022. godine, Budžet za 2023. veći je za cca 15%. Pored Budžeta, na ovoj sjednici vijećnici su usvojili i nacrt strategije razvoja grada Gračanica 2023. -2027.godine, Viziju razvoja mjesnih zajednica, Program rada Gradskog vijeća za 2023. godinu, Informaciju o stanju zaštite građana od neeksplodiranih sredstava i informaciju o stanju sporta.

29. 12. 2022.**Koliko kultura, a koliko sport koštaju poreske obveznike u Gračanici?**

Na 22. sjednici Gradskog vijeća Gračanica (29. 11.) na dnevnom redu našla se Informacija o stanju u kulturi i realizaciji projekata

iz kulture, a na 23 sjednici (29. 12.) informacija o stanju sporta na području Grada. Iako to rijetko koga zanima, ovi materijali pružaju osnovne podatke za odgovor na pitanje koliko koja od te dvije djelatnosti koštaju poreske obveznike Gračanice. Što se tiče kulture, baratalo se sa planiranim ciframa tekućeg Budžeta iz kojih doznajemo da će se za kulturu u 2022. godini izdvojiti ukupno 593.204,00 KM, od čega za djelatnosti Bosanskog kulturnog centra 426.000, a za sve ostale aktivnosti u oblasti kulture 167.000 KM i to najviše, oko 80% za sanaciju društvenih domova i drugih objekata na području Grada (bivše općine). Ako se ima u vidu da u okviru Bosanskog kulturnog centra, Radio Gračanica (koja u užem smislu riječi ne spada u kulturnu, već u informativnu djelatnost) "vuče" preko 50% sredstava koja dolaze iz Gradskog budžeta, zaključak je da se za kulturne djelatnosti u okviru Bosanskog kulturnog centra (Biblioteka, Zavičajna zbirka, Dom kulture, izložbe, priredbe, predstave i dr) iz gradskog budžeta potroši oko 200.000 KM. Kad se uzme u obzir da od onih 167.000 KM najviše "ide" za sanaciju objekata, zaključak je da ukupna "kultura" na području Gračanice, poreske obveznike ne košta više od cca 250.000 KM.

S druge strane, u Informaciji o stanju sporta, nalazimo podatak da je u 2021. godini iz Budžeta Grada izdvojeno ukupno 701.896,00 KM, od čega je putem definisanih transfera za nevladine organizacije (klubove) usmjereno tačno 685.742,00KM (za sportsku infrastrukturu, troškove takmičenja sportskih klubova, plaćanje kotizacije prema sportskim savezima i sl.) Može se pretpostaviti da su izdvajanja za ove aktivnosti u 2022. bila nešto i veća (tekst pišemo prije objavljivanja tih podataka). Na osnovu ovog kratkog uvida, nije teško zaključiti da su izdvajanja za sport iz Gradskog budžeta skoro tri puta veća u odnosu na kulturu. Iako je besmisleno pitanje šta je važnije od važnijeg za lokalnu zajednicu, ipak smatram da bi vrijedilo otvo-

riti pitanje realnosti ovakvog odnosa s ciljem da se izdvajanja za "čistu" kulturu povećaju, uz uslov da se izdvajanja za fizičku kulturu ne smanjuju. Zna se čiji je to zadatak. Neko je davno rekao da je kultura skupa, ali je nekultura još skuplja.

17. 1. 2023.

Umro nastavnik Habib Džananović, poznati radio amater i društveni aktivista iz Doborovaca

Rođen je 1944. godine u Doborovcima, ostao kao ratno siroče, iza oca Habiba, koji je odstupio. Proveo je teško djetinjstvo, ali je uspio završiti osnovnu i srednju školu, a kasnije i višu pedagošku. Čitav radni vijek proveo je u prosvjeti kao nastavnik ruskog i bosanskog jezika, najviše u rodnom mjestu, a jedno vrijeme i u Stjepan Polju. Jedan mandat bio je i direktor Osnovne škole u Doborovcima. I kao nastavnik i kao rukovodilac isticao se u društvenoj i kulturnoj afirmaciji škole i njenom povezivanju sa sredinom u kojoj djeluje. Bio je organizator i kreator raznih kulturno-prosvjetnih manifestacija sa svojim učenicima. Uzimao je aktivnog učešća u društveno-političkom životu i sudjelovao u brojnim projektima realiziranim u Doborovcima. Ono što je najviše volio i čemu je posvećivao svo svoje slobodno vrijeme bilo je radio-amaterstvo... Obučio je generacije mladih radio-amatera, osnovao je više radio klubova, među ostalim i u Stjepan Polju. Bio je dugogodišnji predsjednik Radio kluba "Gračanica", organizator i sudionik brojnih takmičenja i edukativnih radionica, bio je zaljubljenik u prirodu, dugogodišnji lovac, a posljednjih godina života i strastveni planinar... Sudjelovao je u više planinarskih pohoda, obišavši neke od najljepših planina i najvećih vrhova u Bosni i Hercegovini. Poseban interes iskazivao je za prošlost zavičaja, značajnu pomoć pružio je autorima historijske monografije o Doborovcima (Hamzić, Djedović), a kao saradnik "Gračaničkog glasnika" sudjelovao je u prikupljanju podataka za "Žrtvoslov sta-

novništva Gračanice i okoline u Drugome svjetskom ratu". U vrijeme agresije na Bosnu i Hercegovinu (1992.-1995.) sa drugim radio-amaterima uspostavljao je pokidane veze, video-kamerom bilježio događaje i trenutke iz ratne svakodnevnice, a jedno vrijeme obavljao je i funkciju upravitelja Prognaničkog naselja u Doborovcima. Znatno dio sačuvane historijske građe iz tog perioda poklonio je Zavičajnoj muzejskoj zbirci, za Spomen-sobu odbrane Gračanice. Ukopan je u mjesnom greblju Mezarju Bučje-Borik u mahali Džanani u Doborovcima.

19. 1. 2023.

Umro gračanički novinar i karikaturista Mehmed Imširović

Rođen je 1950. godine u Gračanici, gdje je završio osnovnu školu i gimnaziju. Nakon završetka Fakulteta političkih nauka u Sarajevu, čitav svoj radni vijek proveo je u novinarstvu. Počeo je u zeničkoj novini "Naša riječ" i dobojskom "Glasu komuna", nastavio u informativnoj službi gračaničkog "Građevinara", kasnije u dva mandata bio glavni i odgovorni urednik Radio Gračanice i "Delegatskog biltena". Početkom rata, ogledao se kratko i na Eksperimentalnoj televiziji Gračanica. Poslije rata aktivirao se u politici, jedan mandat bio je vijećnik u Opštinskom vijeću (u ime SDP), a potom postavljen za direktora Bosanskog kulturnog centra Gračanica. Po odlasku sa te funkcije, osnovao je Udruženje "Feniks" (strani jezici i sl.), u okviru kojeg, 2002. g., i list pod naslovom "Gračaničke novine" (izlazio s prekidima nešto više od deset godina). Po općoj ocjeni kolega, bio je talentovan novinar i karikaturista. Svoje karikature sabrao je i objavio u posebnoj zbirci, pod naslovom "Kameleoni" (2000. g.). Zbirka je doživjela pozitivne kritike, između ostalih i u ovom časopisu. No, iako je u ovakvim tekstovima pravilo da se piše u duhu načela *de mortuis nihil nisi bene*, u slučaju Imširovića, nažalost, mora se odstupiti od tog pravila i reći da je u svom radu znao

grubo zloupotrijebiti novinarsku slobodu, pa i svoj talenat. Svoj list "Gračaničke novine" često je koristio za privatne obračune i neosnovane napade, između ostalih i na "Gračanički glasnik" i članove njegove redakcije. To je na svojoj koži najviše osjetio, upravo, potpisnik ovih redova, koji je, tek kad mu je udario i na porodicu, bio prinuđen da potraži zaštitu na sudu. Nakon mučnog postupka pred Opštinskim sudom u Gračanici, Imširović je, 19. 12. 2012., pravomoćno presuđen za klevetu, nakon čega se javno izvinuo i demantovao svoje pisanje. Ipak, radi profesionalne korektnosti, ne prešućujemo činjenicu da je ostavio i nekog pozitivnog traga u kulturnoj historiji Gračanice. Zato, neka se, kao i svi ostali pamti po dobrim djelima, a loša će, svakako, potonuti u zaborav. Ukopan je 21. 1. 2023. na gračaničkom greblju "Režići".

20. 1. 2022.

Poreska uprava prodala gračaničku fabriku konfekcije "Olimp"

U neka "davana" vremena bio je to doista "Olimp", u simboličnom značenju vrhunac, u branši modne konfekcije Bosne i Hercegovine. Pored kreditnih sredstava fabrika je građena solidarnim sredstvima građana iz udruženih samodoprinsa svih mjesnih zajednica s područja tadašnje opštine Gračanice. Savremeno i moderno zdanje pušteno u pogon koju godinu pred rat za Bosnu i Hercegovinu bilo je dostojno tog imena. A i poslovanje firme od nekoliko stotina radnika. Potpisnik ovih redova u tim pogonima prvi puta je vidio na licu mjesta kompjutere "uživo", kako rade... Fabrika je preživjela rat, ali je počela ozbiljno posrtati u miru – u neizvjesnim i mutljikavim talasima privatizacije i drugačijim uslovima privređivanja... I konačno, došlo je do sloma. Agoniju preduzeće najbolje odlikava sljedeće hladno službeno saopštenje iz kojeg prepisujemo samo nekoliko rečenica: "U postupku prinudne naplate Kantonalni porezni ured Tuzla je izvršio direktnu prodaju zaplijenjene imovine pore-

znog obveznika dužnika "Olimp" d.d. Gračanica, zbog naplate dužnih javnih prihoda. Cijena za koju je prodana imovina poreznog obveznika – dužnika "Olimp" d.d. Gračanica iznosi 6.700.000 KM. Navedeni iznos kupac je u zakonski ostavljenom roku u cijelosti uplatio na račune dužnih javnih prihoda poreznog obveznika – dužnika "Olimp" d.d. Gračanica. Prodate su nekretnine i pokretne stvari – mašine." Oko 200 radnika ostaje u neizvjesnosti. To nikoga više ne zanima. Čak nije ni vijest. PS. Iako nije zvanično saopšteno, nezvanično je poznato da kupac Trgovinski lanac "Bingo" iz Tuzle.

20. 1. 2022.

Izabrani najbolji sportisti Gračanice za 2022. godinu

Na manifestaciji koju i ove godine organizuje Sportski savez grada Gračanica, za *najuspješnije sportske kolektive* u prošloj godini proglašeni su ŽOK "Gračanica" i RK "Gračanica". U seniorskoj konkurenciji, *najuspješniji sportski pojedinci* su Amela Bačinović (ŽOK "Gračanica" Gračanica) i Anis Devedžić (NK "Bratstvo"). Ostale kategorije: *najuspješnija osnovna škola* – JU Druga osnovna škola Gračanica; *najuspješniji nastavnik tjelesnog i zdravstvenog odgoja* – Šefik Memić (Druga osnovna škola); *najuspješnija srednja škola* – MSŠ "Gračanica"; *najuspješniji profesor tjelesnog i zdravstvenog odgoja* – Enes Begović; Posthumna priznanja: Mirsad Delić, za razvoj odbojke na području Grada Gračanica, Dr. Šemsudin Okanović, za razvoj rukometa na području Grada Gračanica, Hasan Mujić, za razvoj nogometa na području Grada Gračanica, Sabit Korić, za razvoj rukometa na području Grada Gračanica, prof. Branko Janković, za razvoj rukometa na području Grada Gračanica; Posebna priznanja: Gani Muriqi, za doprinos razvoju sporta na području Grada Gračanica, Ekrem Kamarić, za razvoj košarke na području Grada Gračanica; Omladinci, pojedinačno: najuspješnija pionirka – Amina Merdanović (Karate klub

“Gračanica”); najuspješniji pionir–Namik Džafo (RK “Gračanica”); najuspješnija kadetkinja: Amina Bećirović, (Judo klub “Pribava”); najuspješniji kadet–Muhamed Šišić (Šahovski klub “Gračanica”); najuspješnija juniorka–Nermina Kovačević (ŽOK “Gračanica”) najuspješniji junior–Harun Mešić (RK “Gračanica”); Najuspješniji trener – Alma Softić (Ženski košarkaški klub “G-stars”); Najuspješniji sportski radnik - Nedim Šišić, (ARK “Gračanica”)

9. 1. 2023

Roboti za Evropsku uniju: “Metron Automation” d.o.o. Gračanica

Riječ je o firmi s područja automatizacije proizvodnih procesa i robotike koju je osnovala grupa mladih inženjera u aprilu 2019. godine. Konkretnije, ovdje se radi na razvoju aplikacija iz automatizacije upravljanja proizvodnjom i robotike. Osnivač firme je Asim Pedić, koji je uspio okupiti ekipu od 7 mašinskih i elektro inženjera, mladih od 30 godina, koji su riješili da ostanu u BiH i, jednostavno – da uspiju... Nastupaju kao uhodan inovativan tim, sposoban da odgovori na najsloženije zahtjeve klijenata u okviru povećanja produktivnosti, inovacija i konkurentnosti na globalnom tržištu i poručuju: “Projektujemo, gradimo, proizvodimo, montiramo, programiramo cjelokupna rješenja iz oblasti robotike i industrijske automatizacije. Nudimo cjelokupno rješenje određenog proizvodnog procesa, kojeg klijent želi automatizirati ili robotizirati kako bi stepen produktivnosti i efikasnosti podigli na najviši mogući nivo. Specijalizirali smo se na polju: robotskog zavarivanja–izrade specijalnih mašina prema zahtjevima kupaca–robotskih aplikacija: paletiziranja, opsluživanja mašina, bušenja, glodanja i dr.–PLC programiranja–SCADA sistema–industrijskog dizajna–CNC obrada metala.” Tokom 2022. godine, sedam mladih elektro i mašinskih inženjera ove firme, kreiralo je 20 robotskih sistema za industrijske pogone u BiH i Sloveniji. Ove “igračke”

dostižu cijenu od 250 hiljada eura. Njihovi kreatori bi mogli pronaći posao u Evropskoj uniji, ali ih ta mogućnost ne privlači.

31. 1. 2023

Održana 24. sjednica Gradskog vijeća: Statut grada

Statutarnom odlukom (član 25) o organizaciji Grada Gračanica u skladu sa Zakonom o Gradu Gračanica (“Službeni glasnik Grada Gračanica”, broj: 1/19), predviđeno je da Gradsko vijeće donese Statut Grada. Shodno toj odluci, Gradsko vijeće je na sjednici od 30. 10. 2019. godine usvojilo Nacrt Statuta i uputilo ga na javnu raspravu. U međuvremenu, u 2020. godini nastupile su neke vanredne okolnosti – početak pandemije, a kasnije i izbori, pa je i donošenje Statuta prolongirano za novi mandat Vijeća. Napokon, donošenje ovog akta, predviđeno je i izvršeno u Program rada Gradskog vijeća za 2023. godinu, pa je u skladu s tim i nastavljena procedura njegovog donošenja. Statut je u potpunosti usklađen sa zakonskim propisima i prijedlozima iz javne rasprave, te usvojen dvotrećinskom većinom kako je i predviđeno Zakonom o lokalnoj upravi. Pored statuta grada, na ovoj sjednici usvojen je još i program razvoja zaštite i spašavanja ljudi i materijalnih dobara od prirodnih i drugih nesreća na području grada Gračanica 2023.–2027. godina, Nacrt odluke o priznanjima grada Gračanica upućen je na javnu raspravu, usvojen je i Program rada gradonačelnika i gradskih službi za upravu za 2023. godinu, razmotren je i usvojen izvještaj o radu Gradskog vijeća Gračanica i radnih tijela (komisija) u 2022. g., Izvještaj o rješavanju upravnih stvari u upravnom postupku u službama za upravu u 2022. godini, te informacija o stanju spomenika na području grada Gračanica

21. 2. 2022.**Realizovan projekat “Sanacija asfaltne saobraćajnice u Radnoj zoni 1”**

Sanirano je i asfaltirano oko 400 m saobraćajnice u kojoj je već locirano 18 poslovnih subjekata i stvoreni uslovi za pripremu još dvije lokacije. Ukupna vrijednost projekta iznosi oko 152.006,00 KM. Projekat je isinansiran grant sredstvima Federalnog ministarstva razvoja, poduzetništva i obrta u iznosu od 89.000,00 KM, dok je ostatak obezbijeđen iz Gradskog budžeta.

25. 2. 2023.**Umro Tajib Nurikić, dugogodišnji profesor matematike u Gimnaziji “Mustafa Kamarić”**

Potiče iz ugledne ulemanske familije Nurikića iz Vranovića. Rođen je 1944. godine u Vranovićima. Rano djetinjstvo i osnovnu školu završio je u Odžaku, gdje mu je otac bio na službi glavnog imama. Bio je najstariji od četvoro djece u porodici. Nakon osnovne škole, završio je gimnaziju u Maglaju, a potom Prirodno-matematički fakultet u Sarajevu. U školskoj 1968/69. godini dobio je prvo zaposlenje – u gimnaziji u Gračanici, gdje je izveo četrdesetak generacija, dočekavši tu i penziju. Uživao je ugled vrijednog radnika u kolektivu, ostvarivao značajne rezultate sa učenicima na raznim takmičenjima, koji su ga cijenili i poštovali kao pravednog i stručnog nastavnika. Uz posao nastavnika matematike, iskazivao je interes i za kulturna dešavanja u gradu. Bio je veliki zaljubljenik u prošlost, starine i kulturnu tradiciju, osobito šireg zavičaja. Bio je član rukovodstva KDP „Preporod“ u Gračanici. Posjedovao je vrijednu biblioteku s dosta raritetnih izdanja, kao i bogatu zbirku dokumenata, arhivalija i drugog materijala – dijelom kao porodično naslijeđe, a dijelom ono što je sam vremenom prikupio; između ostalog, sačuvao je i dio ostavštine hafiza Ibrahima Mehinagića iz Gračanice. (Neki od dokumenata iz njegove kolekcije prevedeni su i objavljeni u 20.

broju našeg časopisa.) U vrijeme agresije na Bosnu i Hercegovinu, nastojao je oživjeti sjećanje na neke od nepravedno zaboravljenih istaknutih ljudi, intelektualaca i alima, putem predavanja i napisa u ratnoj štampi. Bio je saradnik gračaničkog ratnog lista “Biljeg vremena” u kojem je objavio nekoliko članaka, među kojima i četiri, posvećena znamenitim Gračanlijama – vrhovnom šerijatskom sudiji Hadži Hasan ef. Hadžiefendiću (Hadžikadiji), muderisu Mehmed Teufik ef. Okiću, šerijatskom sudiji hafizu Ibrahim ef. Mehinagiću, te profesoru Muhamedu Tajibu Okiću. U koautorstvu s Amirom Karićem, u tuzlanskom časopisu “Hikmet” objavio je rad o Ibrahim ef. Hasiću iz Gračanice, dugogodišnjem imamu i nekadašnjem političkom osuđeniku, pripadniku pokreta “Mladi muslimani”. Od pokretanja “Gračaničkog glasnika”, bio je jedan od najiskrenijih poštovalaca ovoga istraživačko-publicističkog projekta. Bio je čest gost promocija Časopisa i najiskrenije se radovao svakom njegovom novom broju.

28. 2. 2023.**Ipak se nešto (g)radi: planska dokumentacija za izgradnju brze ceste Tuzla – Doboj**

Kako se moglo čuti na sastanku delegacije Vlade Tuzlanskog kantona koju je predvodio premijer Irfan Halilagić sa predstavnicima JP Autoceste Federacije BiH, ovaj plan, od vitalnog značaja za Gračanicu, ponovo je aktueliziran, ali bez nekih konkretnih poteza i rokova. No, bitno je da više nije u “ladici” i na čekanju. *“Ove godine planirali smo uraditi idejno rješenje, studije i idejni projekat, te smo za te aktivnosti osigurali nešto više od 7 miliona KM. Od Vlade Tuzlanskog kantona očekujemo osiguranje regulacione i prostorno-planske dokumentacije”*, poručili su iz JP Autoceste Federacije BiH. Odgovor premijera Halilagića na to pitanje je ohrabrujući: *“Imajući u vidu da Tuzlanski kanton ima usvojenu svu potrebnu prostorno-plansku*

dokumentaciju, koja ima već utvršenu trasu za ovaj putni pravac, te da se ne planira ići u izmjene tih dokumenata, ne postoje nikakve prepreke da se počne sa izradom idejnog projekta ovog putnog pravca. Dionica prema Dobroju i autoput prema Brčkom su buduće "žile kucavice" ne samo za Tuzlanski kanton, nego i za Federaciju BiH i kao takvim, ovim putnim pravcima posvećujemo posebnu pažnju. Svako eventualno mijenjanje dokumentacije, ne da bi zakočilo, nego bi i unazadilo sve pokrenute projekte izgradnje saobraćajne infrastrukture i deblokade Tuzlanskog kantona, tako da se o tim aktivnostima ne razmišlja". Prostorno-planskom dokumentacijom predviđen je koridor širine od 1 kilometar, u koji bi trebalo "uplanirati" brzu cestu. Kako se moglo čuti na spomenutom sastanku, izgradnju brze ceste Doboj -Tuzla trebalo bi koordinirati sa aktivnostima Agencije za vodno područje rijeke Save, kako bi se i projekat regulacije rijeke Spreče i izgradnje te brze ceste, po mogućnosti, uporedo realizirali. (iz Informativne službe TK)

28. 2. 2023.

Održana 25. sjednica Gradskog vijeća: izmjenama statuta Bosanskog kulturnog centra pravno utemeljen "Gradski muzej" u Gračanici

Prije donošenja odluke o izmjeni Statuta BKC, vijećnici su usvojili odluku o pristupanju izmjenama i dopunama Statuta grada Gračanica. Tim izmjenama i dopunama bit će obuhvaćene odredbe Statuta kojima se reguliše način izbora članova u vijećima mjesnih zajednica. Potom su usvojene odluke o prestanku i dodjeli mandata članova vijeća mjesnih zajednica Pribava, Gračanica i Doborovci. Usvojen je izvještaj o radu gradonačelnika u 2022. i Izvještaj o izvršenim procjenama prometa nepokretnosti i prava za 2022. godinu, te Informacija o stanju zaštite od požara i vatrogastva, praćenja i izvršenja plana zaštite od požara na području grada Gračanica u 2022. godini

1. 3. 2023.

Obilježavanje Dana nezavisnosti Bosne i Hercegovine u Gračanici: u znaku izložbe "Znakovi Bosne" Halide i Seada Emrića

Pored prigodnih kulturno-umjetničkih i sportskih sadržaja, koje su priredili učenici gračaničkih osnovnih i srednjih škola, te polaganja cvijeća na spomen obilježja, časova historije i prigodnih obraćanja, posebnu pažnju privukla je ova izložba, postvaljena u foajeu Bosanskog kulturnog centra, gdje su održani i spomenuti prigodni govori. Ali, poseban "govor o Bosni" kazuje ova neobična izložba. To je ustvari, umjetnički projekat na kojem više od deset godina u svom umjetničkom ateljeu "SerhatAert studio" u Bužimu vode dvoje umjetnika–Halida Emrić u keramici i Sead Emrić u grafici. Svojim nesumnjivim talentom i velikom upornošću u tim svojim radovima uspjeli su kreirati sjajnu umjetničku priču o našoj domovini Bosni i Hercegovini i njenoj kulturnoj baštini. Ispisujemo još nekoliko rečenica sa afiše ove izložbe: "Svaki artefakt sa ove izložbe utemeljen je na nekom znaku iz bogate kulturne historije Bosne i od njenih najstarijih vremena do danas, a njihova djela odišu svježinom usaglašenom sa modernim umjetničkim kontekstom. Ponuđena umjetnička djela na ovoj izložbi skladana sa visokim estetskim kriterijima na najbolji način daju doprinos da likovna publika kod nas i u svijetu dobije što bolju pozitivnu sliku o ovoj zemlji koja je u prošlosti bila plodno tlo za kreativno preplitanje različitih kulturnih uticaja." Grafikama Seada Emrića uljepšali smo ovaj broj našeg časopisa.

29. 3. 2023.

Održana 26. sjednica Gradskog vijeća Gračanica: Strategija razvoja 2023.-2027.

Radi se o dokumentu kojim se definišu javne politike i integralno usmjerava razvoj grada u navedenom periodu. Služit će kao osnova

za izradu godišnjih programa rada gradonačelnika i gradske uprave, programa javnih investicija, budžeta itd. Sadrži prioritete prostornog razvoja grada Gračanica i usklađena je sa razvojnim pravcima definisanim u strateškim dokumentima Federacije i TK za period 2021.–2027. godine. Dokument je jako obiman, sadrži preko 250 stranica teksta, na kojima je, u okviru četiri strateška cilja, definisano i opisano desetak ključnih strateških projekata kao što su: završetak privredno kulturnog i sportskog centra “Bazen” Gračanica; izgradnja raskrsnice sa kružnim tokom na rijeci Sokoluši (lokacija Dom kulture Gračanica – “Žitokombinat”; sanacija depozicije komunalnog otpada grada; rješavanje vodosnabdijevanja u Lukavici; izgradnja postrojenja za tretman pitkih voda u Mjesnoj zajednici Soko; izgradnja fabrike za prečišćavanje otpadnih voda kanizacionog sistema u Mjesnoj zajednici Gračanica; obezbjeđenje proticajnog profila rijeke Spreče na kritičnim lokacijama na području grada; toplifikacija grada Gračanica III. faza; sanacija krovova sa azbestno-cementnim salonitnim pokrovom; deminiranje kontaminiranog područja grada. Od ostalih tačaka dnevnog reda ove sjednice izdvajamo: Odluku o priznanjima, odluku o bezbjednosti saobraćaja na cestama grada Gračanica, Odluku o javnom redu i miru; Odluku o radnom vremenu objekata u oblasti trgovine, ugostiteljstva, turizma, obrtničkih i srodnih djelatnosti na području grada Gračanica. Usvojen je i plan upisa učenika u prvi razred JU Mješovite srednje škole i Gimnazije “dr. Mustafa Kamarić”, te izvještaji o radu nekoliko javnih ustanova u 2022. godini: centar za socijalni rad, Bosanski kulturni centar, Dječije obdanište “Naša djeca”, usvojena je i informacija o dodjeli stipendija učenicima srednjih škola i studentima za školsku 2022/2023. godinu

5. 4. 2023.

Kad se na vrijeme počne: intenzivna komunalna izgradnja na području Gračanice

Zahvaljujući relativno lijepom vremenu i činjenici da je ovogodišnji Gradski budžet usvojen na vrijeme, u prva tri mjeseca ove godine realizovano je više planiranih infrastrukturnih projekata ili su stvoreni uslovi za njihovu ubranu realizaciju. Po podacima sa službenog portala Grada, na području urbanog dijela Gračanice izvršena je sanacija puta u naselju Bijela Polja, sanacija dijela ulice Crni put – Halilovići, Bulakov sokak kao i ulaz u Zelenu pijacu, izvršena rekonstrukcija dijela ulice Čiriš pored pošte, te asfaltirana ulica u naselju Varoš kod SOS Dječijeg sela. U Radnoj zoni Gračanice rekonstruisan je put kod šoping centra “Etna” i put kod benzinske pumpe “Gazprom” u naselju Hajdarovac do magistralnog puta.

Što se tiče komunalija, izvršeno je čišćenje dijelova vodotoka rijeka Sokoluše i Drijenče, nasipanje makadamskih puteva na području mjesne zajednice Gračanica i u drugim mjesnim zajednicama na području grada, a u toku su radovi na izgradnji oborinske kanalizacije kod «Robota».

Na ostalim područjima Grada, izvršena je sanacija lokalnih puteva u Stjepan Polju, Babićima, Sokolu i Lendićima, a natkriven je i ulaz u ambulantu u Gornjoj Orahovici. U oblasti vodosnabdijevanja, u Škahovici su izgrađeni dovodni cjevovodi i razvodne mreže sa pratećim objektima. U okviru projekata vodosnabdijevanja, izgrađen je dovodni cjevovod izvora “Birkovac” – centralni rezervoar, te rezervoar od 150 m³ u Donjoj Orahovici, a sa manjim intervencijama poboljšano je vodosnabdijevanje u Malešićima i Babićima. U toku su radovi na sanaciji lokalnih puteva na području Doborovaca i Buka.

U ove projekte izvršena su ulaganja iz Gradskog budžeta, zavisno od njihove veličine od 5.000 do 200.000 KM. U nabro-

jane projekte do sada je uloženo ukupno 1.563.332,20 KM kako je i planirano.

7. 4. 2023.

Povodom 7. aprila – Dan oslobođenja Gračanice u Drugom svjetskom ratu – izložba fotografija “Gračanica u socijalizmu”

Ovaj datum obilježen je svečanom akademijom održanom u Bosanskom kulturnom centru Gračanica. Uz prigodan kulturno-umjetnički program, na akademiji se obratio predsjedavajući Gradskog vijeća Gračanica Mirzet Topčagić, nakon čega su prisutni razgledali izložbu fotografija “*Gračanica u vrijeme socijalizma*”, postavljenu u holu BKC-a. Izložba se sastoji od 80-ak fotografija iz kolekcije Gradskog muzeja Gračanica, koje oslikavaju urbani razvoj i prilike u Gračanici u periodu od 1945. do 1991. godine – vremenu u kome je 7. april, inače, obilježavan kao centralni opštinski praznik. Uz fotografije je, također, izložena i kolekcija odabrane historijske građe iz fonda Gradskog muzeja i Narodne biblioteke “Dr. Mustafa Kamarić”, koja upotpunjuje priču o Gračanici u navedenom razdoblju. Autor izložbe je Edin Šaković, stručni saradnik za kulturno naslijeđe i voditelj Gradskog muzeja.

27. 4. 2023

Održana 27. sjednica Gradskog vijeća: izvršenje Budžeta i izvještaji o radu javnih ustanova u prethodnoj godini

U 2022. godini Gradski budžet ostvaren je u iznosu od 23.260.499 KM. Budžetski rashodi iznosili su 17.150.128 KM. Ostvareni višak ili razlika između ostvarenih prihoda i ras-

hoda evidentirana je u iznosu od 6.110.371. To je rezultat većih prihoda i primitaka nad rashodima i izdacima, te nerealizovanih projekata, prenesenih u 2023. godinu. Ostvareni Budžet Grada za prvo tromjesečje ove godine iznosi 5.060.869 KM, rashodi i izdaci 3.762.483 KM, što je u nivou plana i prošlogodišnjih trendova. Višak se pojavio takođe usljed nerealizovanih a planiranih projekata, što će se, prema očekivanju, u narednom periodu izbalansirati. Vijeće je usvojilo odluke o razrješenju i imenovanju članova savjeta za mjesne zajednice Gračanica, Donja Lohinja i Babići, imenovalo članove upravnih odbora javnih zdravstvenih ustanova Doma zdravlja i Gradske apoteke, razmatralo i usvojilo izvještaje o radu i finansijskom poslovanju tih zdravstvenih ustanova i Veterinarske stanice. Vijećnici su informisani o rezultatima mjerenja zadovoljstva građana javnim uslugama i radom Gradskog vijeća. Radi se o materijalu u kojem su dati rezultati ankete sa mnoštvom grafikona i izvedenih procenata kojim se dokazuje da su građani prezadovoljni u što je teško povjerovati. Informaciju o higijensko-epidemiološkoj situaciji na području Gračanice u 2022. godini, koju je prosljedio Dom zdravlja, vijećnici su primili k znanju. Iz suhe statistike u kojoj se jako teško snaći vidi se da je u 2022. godini na području grada Gračanice prijavljeno ukupno 1580 oboljelih lica i da je to nešto manje u odnosu na prethodnu 2021. godinu, kada su bile prijavljene 1863 oboljele osobe. U informaciji nema ni zaključku, a niti predloženih mjera za poboljšanje stanja u toj oblasti, pa se stiče utisak “da su svi o ovdje zadovoljni”.

